

समे – 12:25

<><><><><><>

Terrorists Killed

जम्मू संभाग दे किश्तवाड़ जिले च छात्तरू दे जांगली इलाके च सुरक्षाबलें आसेआ चलाए जा करदे आतंकवाद—रोधी अभियान च द'ऊं होर आतंकवादिणं गी मारी—मुकाई दित्ता गेआ ऐ। एह्दे शा पैहले जंदे रोज सुरक्षाबलें इक आतंकवादी दा सफाया कीता हा। करठन प्हाड़ी इलाका ते खराब मौसम दे बावजूद सुरक्षाबलें पूरे तगड़ेयाई कन्नै अपना अभियान जारी रक्खे दा ऐ। टाक्करे आहली थाहरै थमां खरी मती मात्रा च थेहार—असलाह ते गोला—बरूद बी बरामद कीता गेआ ऐ, जेह्दे च 1 एके ते 1 एम—4 किस्मे दी रैफल बी शामिल ऐ। अभियान अजें बी जारी ऐ ते ब्योरे गी बलगेआ जा'रदा ऐ। ध्यानजोग ऐ जे इलाके च आतंकवादिणं दे छप्पे होने दी टकोहदी सूह थोने मगरा सुरक्षाबलें 9 अप्रैल गी किश्तवाड़ दे छात्तरू आले जांगली इलाकें च सांझे तौरा पर एह् अभियान रंभेआ हा।

<><><><><><>

JCO-Martyred

जंदी चिरे रातीं जम्मू जिले दे अखनूर सेक्टर च नियंत्रण रेखा दे पारै थमां आतंकवादिणं दी घुसपैठ गी नकाम करदे होई छिड़े दे इक टाकरे दरान फौज दा इक जेसीओ शहीद होई गेआ। फौज आस्सेआ दित्ती गेदी अधिकारिक जानकारी मूजब अखनूर सेक्टर दे केरी बट्टल इलाके च इक नाले कश भारी थेआरें कन्नै लैस किश आतंकवादिणं दी नकलोहरकत दिक्खे जाने पर उत्थें तैनात सौहगे सैनिकें उनेंगी खबरदार करदे होई ललकारेआ जेह्दे पर टाकरा शुरू होई गेआ। इस्सै दरान घायल फौज दा एह् अधिकारी अज्ज बउलै वीरगति गी प्राप्त होई गेआ।

<><><><><><>

LG Ayodhya Parv

उपराज्यपाल मनोज सिन्हा होरें कल नमीं दिल्ली च “अयोध्या पर्व 2025” गी संबोधत कीता। एह् कार्यक्रम इंदिरा गांधी नैशनल सेंटर फॉर आर्ट्स, श्री अयोध्या न्यास ते प्रजा संस्थान आस्सेआ आयोजित कीता गेदा हा।

इस मौके पर उपराज्यपाल होरें त्रऊं दिनें दे सांस्कृतिक पर्व पर सब्बनें गी बधाई दित्ती। उनें आखेआ जे अयोध्या छड़ी इक भूगालिक थाहर गै नेई ऐ सगुआं एह् अध्यात्म, सुशासन ते साढ़ी सगोसार संस्कृति दा इक केन्द्र बी ऐ। उनें आखेआ भगवान राम हुंदी जन्म भूमि साढ़ी पंछान ते इकजुटता दा प्रतीक ऐ। उपराज्यपाल होरें एह् बी आखेआ जे अयोध्या प्राचीन भारत दी ऐसी सौम्य शक्ति रेही ऐ जिन्ने अपने सरल पर सुददे प्रभाव कन्नै दुनिया भरै च अध्यात्मिक मुल्ये कदरें ते विचारें गी बढ़ावा दिंदे होई भारतीय लोक संस्कृति दा व्यापक म्होल दुनिया भरै च कायम करने दा कम्म कीता ऐ।

<><><><><><>

Dy.CM

उपमुख्यमंत्री सुरिन्दर चौधरी होरें जम्मू च श्रम ते रोजगार मैहकमे दे कम्मेंकाजें दा जायजा लैने लेई इक बैठक दी अध्यक्षता कीती। बैठक दरान मैहकमे आस्सेआ बक्ख—बक्ख स्कीमें तैहत प्रगति ते उपलब्धिएं गी उजागर करने लेई इक पावर पोआइंट पेशकारी बी कीती गई। इस दरान उपमुख्यमंत्री होरें गी जानकारी दित्ती गई जे मैहकमे दी 10 लक्ख रपे कोला घट्ट दी लागत आले 65 लक्ख भलेया लौहके उद्यम कायम करने दी योजना ऐ जेह्दे च आवेदकें गी दोहार दे बदले कोई जमानत गारंटी जां किश वैध रखने दी लोड़ नेई होग मिशन युवा लेई कुल बजट 1 ज्हार 8 सौ 30 करोड़ रपे ऐ। उपमुख्यमंत्री होरें इस मौके पर सरकार आस्सेआ चलाई जा'रदी बक्ख—बक्ख श्रम ते रोजगार सरबंधी योजनाएं थमां लाह ठोआने लेई लोकें गी जागरूक बनाने दी लोड़ पर जोर दित्ता।

<><><><><><>

Archives

ट्रांसपोर्ट मंत्री सतीश शर्मा होरें जम्मू कश्मीर च आरकाइव्ज यानि महाफजखाने दे रिकार्ड दा 100 प्रतिशत डिजीटिकरण करने दा आह्वान कीता ऐ। जम्मू दे कन्वेंशन सेंटर च कल लोआई गेदी, महाफजखाने सरबंधी राष्ट्रीय समिति दी दऊं रोजा 49मीं बैठक दे उद्घाटन सत्र दरान बतौर मुख्य परौहने गल्ल करदे होई मंत्री होरें केन्द्र शासत प्रदेश च इस भेठा अजें तोड़ी होए दे कम्में दी सराहना कीती ते आखेआ रिकार्ड दा डिजीटिकरण साढ़े एतिहासक, कलात्मक ते सांस्कृतिक विरसे गी सजोइयै रखने च मती महत्वै आली भूमका नभांदा ऐ।

<><><><><><>

Painting

ट्रांसपोर्ट मंत्री सतीश शर्मा होरें कल कला केन्द्र जम्मू च त्रै दिनें तोड़ी चलने आली चित्रकारी प्रदर्शनी दा उद्घाटन कीता। इस नमैश च मशहूर चित्रकार मुनीर अली खान हुंदी चित्रकारी दे खूबसूरत नमूने लोकें दे दिखने लेई रखे गेदे, जिंदे च मुनीर खान हुंदी कलात्मक सोच ते बनसब्बनी किस्मा दे अंदाज दिक्खे जाई सकदे न। इस मौके अपने संबोधने च मंत्री होरें सांस्कृतिक पंछान गी आकार देने ते नमीं पीढ़िएं गी प्रेरत करने च कला दे महत्व गी उजागर कीता। कला केन्द्र दे सचिव डॉ. जावेद राही होरें सुआगत भाषण पेश करदे होई सब्बने कला प्रेमिएं गी प्रदर्शनी दिक्खने लेई साददा दित्ता।

<><><><><><>

CS-NCORD

मुख्य सचिव अटल डुल्लू होरें जम्मू कश्मीर च नशाखोरी ते नशीले पद्धार्थे दी तस्करी पर रोक लाने सरबंधी कम्में कारवाइएं दी समीक्षा करने लेई सददी गेदी, यूटी सतह दी नार्कोटिक कोआडिनेशन दी 13मीं बैठक दी अध्क्षता करदे होई उनें इस सरबंधी कनून दी अमलावरी ते एहदे तैहत कनूनी कारवाइएं गी सख्ती नै अंजाम देने लेई आखेआ। उनें गलाया जे इस कबैतु कन्नै निबड़ने लेई सख्ती बरतना बड़ा जरूरी ऐ। मुख्य सचिव होरें इस मौके ही जिले च जिला सतह दिएं निगरान कमेटिएं दा गठन करने लेई बी आखेआ।

<><><><><><>